

Wednesday, April 29, 2026

Time - 2:30pm - 2:35pm

**AKASHVANI AIZAWL**  
**REGIONAL NEWS UNIT**

**12<sup>TH</sup> RESULT**

Mizoram Board of School Education-in Higher Secondary School Leaving Certificate (HSSLC) 2026, RESULT vawiina tihchhuahah zirlai exam zawng zawng zinga zaa 87.67 an pass a, kumin atangin Top 10 bakah zirlaite pass na division tarlan a ni lo.

Kuminah hian exam beitu hi zirlai 12243 niin zirlai 10734 in an pass-a, exam zawng zawng zinga zaa 87.67 an pass a, nikum 2025 leh kum hmasa 2024 aiin pass percentage a tha zawk a, kumin hian a pumpui khaikhawmin ARTS SCIENCE leh COMMERCE ah nikum aiin pass percentage a sang zawng a, nikumah zaa 81.10 a nih laiin kuminah za a 87.67 a ni a, nikum aiin zaa 6.57 in a sang a ni.

Kumin HSSLC exam-ah hian compartment 115 an awm a, kumin HSSLC exam ah hian mipa aiin hmeichhia exam hmachhawn 1,033 in an tam zawk a, pass zat pawh hmeichhia tam zawkin mipa aia hmeichhe pass mi 904 in an tam a ni.

Kuminah hian Arts Subject ah mi 8714 exam zingah 7575 in an pass a, hlawhtling zat zaa 86.93 an ni.

Science Subject ah mi 2770 exam zingah 2472 in an pass a, hlawhtling zat zaa 89.24 an ni.

Commerce Subject ah mi 759 exam zingah 687 in an pass a, hlawhtling zat zaa 90.51 an ni.

MBSE Chairman Pu JH Zoremthanga chuan MBSE pisaah thuthar thehdarhtute kawmin, kumin hian compartment exam 115 te tan a rang thei ang bera exam buatsaih an tum a, NEP 2020 ruahmanna angin subject 1 a improvement exam pawh kuminah hian buatsaih an tum tih a sawi.



**CM**

Chief Minister Pu Lalduhoma chuan tunlai thiamna hrang hrang hmang thei tawh thalaite chu rampum huap inelna hmachhawn ngam a, inbuatsaih tha turin a chah.

Mizo Students' Union (MSU) General Headquarters chuan vawiin khan Dawrpui Multipurpose Hall-ah an kum 25 tlin 'Silver Jubilee' an lawm a, Pu Lalduhoma chuan, Social Media lamah thalai ten hun an pe tam lutuk a ni thei ang em tih chu ngaihtuah a ngai a ti a, tun hma chuan India ramah kan champion thei tih sawiin tun hnuah an awm ta manglo chu ngaihtuah chian a ngai tih a sawi a. Chutihrualin, tun hnaia result chhuak atangin Sorkar sikul ten hma an sawn mek chu lawmawm a tih thu a sawi a, zirlaite ten sorkar sikul chu luhna tlak ni tura siam an tum tih a sawi bawk.

(Byte: Pu Lalduhoma, Chief Minister)

Chief Minister chuan Mizoram chauh ni loin Manipur leh Myanmar a Zo hnathawk hrang hrang awmte inpumkhat a pawimawh tih a sawi bawk a ni.

Pu Lalduhoma hian MSU Silver Jubilee Lung a phun nghal a, lungphun chu nakinah MSU Office takah phun sawn leh a nih tur thu a sawi a bakah Souvenir 'Nghalpu' a tlangzarh bawk.

Silver Jubilee lawmna hunah hian MSU President Pu B. Lalkhawngaihzuala chuan 'Quality Education' an ngaipawimawh tih sawiin, zirlai naupang a tha sa chauh ni loin zirlai chak lo zawkte thum chak thei school a hlut thu sawiin, chumi ti thei tura sorkar a insiamrem mek chu lawmawm a tih thu a sawi ve bawk a ni.



## **PRE MONSOON RAIN**

Fur intham chhohah ruah a sur nasa hle a, tun dinhmunah Lawngtlai, Serchhip leh Aizawl ten ruahtui an dawng tam zual a, hetihlai hian Mamit leh Kolasib Dist ah te ruah leh thli na tak a thawh theih avangin mipui te inralring turin Indian Meteorological Dept (IMD) Aizawl Director Pu Sudheer Kumar Dwivedi an Akashvani a hrilh a ni.

District dangah chuan ruah a sur tho tura hmuh lawk a ni a, thli nen na taka thawk tura ngaih erawh a ni lo thung a ni.

